

আগের আদেশ বাতিল, স্কুলে ভর্তিতে কোটার নতুন আদেশ



ফাইল ছবি

সমকাল প্রতিবেদক

প্রকাশ: ০৪ মার্চ ২০২৫ | ১৭:৪১ | আপডেট: ০৪ মার্চ ২০২৫ | ১৭:৪৭



২০২৪ সালের জুলাই-আগস্ট অভ্যুত্থানে আহত ও নিহতদের পরিবারের সদস্যদের সরকারি বিদ্যালয়ে ভর্তির ক্ষেত্রে নির্ধারণ করা কোটা বাতিল করেছে শিক্ষা মন্ত্রণালয়। তবে আসন সংখ্যার অতিরিক্ত হিসেবে প্রতি শ্রেণিতে একজন করে ভর্তির জন্য আসন সংরক্ষণ করতে নির্দেশনা জারি করা হয়েছে। যা কেবল ২০২৫ শিক্ষাবর্ষের জন্য প্রযোজ্য হবে।

মঙ্গলবার শিক্ষা মন্ত্রণালয়ের মাধ্যমিক ও উচ্চশিক্ষা বিভাগ প্রতি শ্রেণিতে অতিরিক্ত হিসেবে একজন করে ভর্তির কোটা সংরক্ষণ করে অফিস আদেশ জারি করে।

এর আগে গত ২০ ফেব্রুয়ারি শিক্ষা মন্ত্রণালয়ের মাধ্যমিক ও উচ্চশিক্ষা বিভাগ থেকে সরকারি মাধ্যমিক বিদ্যালয়ে শিক্ষার্থী ভর্তিতে মুক্তিযোদ্ধাদের ৫ শতাংশ কোটার সঙ্গে ২০২৪ সালের জুলাই-আগস্ট অভ্যুত্থানে আহত ও নিহতদের পরিবারের সদস্যদের যুক্ত করে এক আদেশ জারি করা হয়েছিল।

মন্ত্রণালয়ের ওই আদেশ সোমবার মাধ্যমিক ও উচ্চশিক্ষা অধিদপ্তর শিক্ষা প্রতিষ্ঠানগুলোকে বাস্তবায়নের নির্দেশ দেয়া হয়। এই নির্দেশনার পর বিভিন্ন গণমাধ্যমে সংবাদ প্রকাশিত হয়।

মঙ্গলবার নতুন জারি করা আদেশে বলা হয়, ২০২৪ সালের জুলাই-আগস্ট মাসে গণঅভ্যুত্থানের ফলে অনেক ছাত্র-জনতা আহত ও শহীদ হন। তাদের পরিবারের সদস্যদের সরকারি মাধ্যমিক বিদ্যালয়ে ভর্তির বিষয়ে গত ২০ ফেব্রুয়ারি জারি করা আদেশ বাতিল করে নতুন আদেশ জারি করা হলো।

আদেশে আরও বলা হয়, জুলাই গণঅভ্যুত্থান ২০২৪-এ আহত ও শহীদ পরিবারের সদস্যদের সরকারি মাধ্যমিক বিদ্যালয়ে লটারির মাধ্যমে ভর্তির জন্য নির্ধারিত আসন সংখ্যার অতিরিক্ত প্রতি শ্রেণিতে একজন করে ভর্তির জন্য আসন সংরক্ষিত থাকবে। জুলাই গণঅভ্যুত্থান ২০২৪-এ আহত ও শহীদ পরিবারের সদস্যদের আসন নির্ধারণের ক্ষেত্রে সংশ্লিষ্ট প্রমাণপত্র/গেজেটের সত্যায়িত কপি আবেদনপত্রের সঙ্গে সংযুক্ত করতে হবে এবং ভর্তির সময় মূল কপি প্রদর্শন করতে হবে। এ ক্ষেত্রে সংশ্লিষ্ট ব্যক্তির মুক্তিযুদ্ধ বিষয়ক মন্ত্রণালয় থেকে ইস্যুকৃত জুলাই গণঅভ্যুত্থান ২০২৪-এ শহীদদের গেজেট যথাযথভাবে যাচাই করে ভর্তি কার্যক্রম সম্পন্ন করতে হবে। জুলাই গণঅভ্যুত্থান ২০২৪-এ আহত ও শহীদ পরিবারের সদস্যদের পাওয়া না গেলে মেধা তালিকা থেকে ওই আসনে ভর্তি করতে হবে। কোনও অবস্থায় আসন শূন্য রাখা যাবে না।

এ আদেশ কেবল ২০২৫ শিক্ষাবর্ষের জন্য প্রযোজ্য হবে।